



Foras na Gaeilge

**Miontuairiscí Chruinnithe Boird Fhoras na Gaeilge
don bhliain 2021**

Dáta	Leathanach
29 Eanáir	02
01 Márta	08
12 Márta	12
23 Aibreán	21

Miontuairiscí ón 186ú Cruinniú Boird a tionóladh Dé hAoine 29 Eanáir 2021 ar líne ar Zoom

I láthair: B. Ó Muirí (Leas-Chathaoirleach), M. Ní Neachtain, C. McGuinness, S. Ní Chéide, M. Ní Chonghaile, N. Ó Gallochobhair, W. Majekodunmi, D. Mac Cárthaigh, N. Ní Chiaráin, D. Ó Brolcháin, K. Ó hEadhra, L. Ní Riada, L. Rushe, C. Mac Giolla Mhín.

Ag freastal: S. Ó Coinn (Príomhfheidhmeannach), E. Ní Chorráin (Leas-Phríomhfheidhmeannach), É. Ó hArgáin (Rúnaí), S. Ó hEidhin, J. Ó Labhraí agus K. Johnston.

ROIMH AN gCRUINNIÚ: OSRADHARC AR STRUCHTÚIR AGUS OBAIR FHORAS NA GAELIGE

Thug an Leas-Phríomhfheidhmeannach agus Stiúrthóir Seirbhísí Oideachais, E. Ní Chorráin, cur i láthair ar mhór-réimsí oibre Fhoras na Gaeilge don chúigear Comhaltaí nuacheaptha: D. Ó Brolcháin, K. Ó hEadhra, L. Ní Riada, L. Rushe agus C. Mac Giolla Mhín.

Fiosraíodh an mbeidh deis ag Comhaltaí cuairt a dhéanamh ar dheontaithe a fhaigheann maoiniú ón bhForas mar chuid de ghnó an Bhoird. Soiléiríodh gur faoin bhfoireann, seachas faoin mBord, atá sé monatóireacht a dhéanamh ar dheontaithe, ach go n-eagraítear Cruinnithe Boird in ionaid éagsúla ó am go chéile.

Ceistíodh an raibh maoiniú faighte ag na Líonraí Gaeilge go fóill agus cuireadh in iúl gur chinn na Líonraí gan an maoiniú a ghlacadh de bharr gur cheap siad go mbeadh siad faoi mhíbhuntáiste ag na coinníollacha scéime a bhí fógartha ag an am don Scéim Pobal Gaeilge.

01.186 FOCAL ÓN LEAS-CHATHAOIRLEACH AGUS CUR IN AITHNE AG COMHALTAÍ

Chuir an Leas-Chathaoirleach fáilte roimh na Comhaltaí Boird chuig an gcruinniú atá á reáchtáil ar Zoom, de bharr ghéarchéim Covid-19, agus gabhadh buíochas leis na Comhaltaí as a dtacaíocht maidir le socruithe breise a dhéanamh i dtaobh cruinnithe éagsúla le linn na héigeandála. Cuireadh in iúl go gceapfar Cathaoirleach agus Comhalta eile ar an mBord ag an gcéad chruinniú eile den Chomhairle Aireachta Thuaidh-Theas (CATT) ag deireadh mhí an Mhárta.

Gabhadh comhghairdeas leis an gComhalta Boird N. Ní Chiaráin ar bhreith a mic.

Cuireadh fáilte roimh na Comhaltaí nuacheaptha: D. Ó Brolcháin, K. Ó hEadhra, L. Ní Riada, L. Rushe agus C. Mac Giolla Mhín.

Chuir gach duine i láthair an chruinnithe, idir Chomhaltaí Boird agus fhoireann an Fheidhmeannais, iad féin in aithne do na Comhaltaí nuacheaptha.

Cuireadh in iúl gurb ionann trian de bhallraíocht reatha an Bhoird agus córam ag cruinnithe den Bhord, agus go gciallaíonn sin cúigear Comhaltaí faoi láthair.

02.186 MIONTUAIRISCÍ

Glacadh le miontuairiscí an Chruinnithe Boird ar an 11 Nollaig 2020.

03.186 NITHE AG ÉIRÍ AS NA MIONTUAIRISCÍ

Thagair an Príomhfheidhmeannach do Shéala an Aistriúcháin agus dhearbhaigh sé gur 47 duine a ghlac páirt sa scrúdú. Chuir sé in iúl go mbeadh an tagairt i dtuairisc na hArdbhainistíochta sna miontuairiscí le ceartú – gur 42 a bhí luaite. Cuireadh in iúl go bhfoilseofaí torthaí an scrúdaithe go luath.

Cuireadh in iúl go réachtálfaí scrúdú eile creidiúnaithe don Séala i mbliana. Dearbhaíodh go bhfuil thart ar 50 duine ar an liosta feithimh faoi láthair, agus go gcuirfí tús le próiseas tairisceana ina leith nuair a bheidh críoch tagtha leis an mbabhta seo den scrúdú.

D'fhág D. Mac Cárthaigh an cruinniú ag an bpointe seo de bharr baol choimhlint leasa.

Tagraíodh don mhaoiniú eisceachtúil a ceadáíodh do Leabhar Breac ag Cruinniú Boird mhí na Nollag 2020, agus dearbhaíodh gur glacadh leis an tairiscint. Tuairiscíodh nach rabhthas ábalta an difríocht idir an maoiniú eisceachtúil agus an maoiniú a gheobhadh Leabhar Breac tríd an Scéim a cheadú as tearc-chaiteachas Chlár na Leabhar Gaeilge mar gur le clár oibre 2020 a bhain an tearc-chaiteachas sin.

D'fhill D. Mac Cárthaigh ar láthair an chruinnithe ag an bpointe seo.

04.186 BAOL COIMHLINTÍ LEASA

Níor chláraigh comhalta ar bith baol coimhlint leasa.

05.186 COVID-19

Thug an Stiúrthóir Seirbhísí Corparáideacha tuairisc maidir le socrúithe Fhoras na Gaeilge i dtaca le Covid-19. Tugadh suntas do na pointí seo a leanas:

- i) Tá na hoifigí uilig dúnta nó ar oscailt go teoranta ó bhí Lá Fhéile Pádraig 2020 ann;
- ii) Tá trádstóras ÁIS ar oscailt agus ag feidhmiú ar bhonn teoranta;
- iii) Tá trealamh curtha amach chuig an bhfoireann chun tacú leo agus iad ag obair ó chian;
- iv) Tá ardfheidhmíocht léirithe ag an bhfoireann in ainneoin na socrúithe reatha oibre;
- v) Scaipfear an ceistneoir bliantúil ar an bhfoireann an tseachtain seo ar Shásamh as Obair;
- vi) Tá rochtain ar na hoifigí teoranta do thascanna cothabhála amháin faoi láthair de bharr stádas na dianghlása sa dá dhlínse;
- vii) Tá Foras na Gaeilge ullmhaithe don athoscailt ó thaobh trealaimh de;
- viii) Déanfar athbhreithniú ar scéimeanna an Fhoras na Gaeilge i gcomhthéacs COVID-19, agus cuirfear tuairisc ina leith sin faoi bhráid an Bhoird i mí an Mhárta.

Fiosraíodh an bhfuil deiseanna ag an bhfoireann plé leis an bhfoireann ardbhainistíochta tríd a gceardchumann, agus cuireadh in iúl go bhfuil Coiste Páirtnéireachta ann idir na ceardchumann SIPTU agus FÓRSA agus an fhoireann bhainistíochta, agus gur féidir le fostaithe plé leis an bhfoireann ardbhainistíochta tríd an bhfóram sin. Tuairiscíodh go bhfuil dea-chaidreamh idir an fhoireann ardbhainistíochta agus na ceardchumann.

06.186 TUAIRISC NA hARDBHAINISTÍOCHTA

Chuir an Príomhfheidhmeannach Tuairisc na hArdbhainistíochta i láthair agus bhí plé ina leith.

Tugadh suntas don aitheantas a tugadh do Chomóradh 1500 bliain Cholmcille i dtuairisc ón Roinn Gnóthaí Eachtracha ó dheas maidir leis an gcaidreamh idir Éirinn agus Albain.

Tugadh suntas don athdháileadh iomlán in 2020.

Tagraíodh don chruinniú den Choiste Comhairleach den Pholasaí don Oideachas Gaeltachta, ina raibh an Leas-Phríomhfheidhmeannach i láthair. Fiosraíodh an féidir iarraidh ar an gCoiste tosaíocht a dhéanamh de na scoileanna Gaeltachta ar mhian leo múineadh trí mheán na Gaeilge, seachas a bheith ag díriú airde ar na scoileanna nach mian leo sin.

D'fhág M. Ni Chonghaile an cruinniú ag an bpointe seo de bharr baol coimhlint leasa.

Cuireadh moladh faoi bhráid an Bhoird síneadh 6 mhí don tréimhse 01/07/2021– 31/12/2021, ar chostas €43,712, a thabhairt do dheontaithe reatha an SPG. Soiléiríodh go raibh an moladh seo á chur de bharr nach mbeidh deis ann buiséad an chéad bhabhta eile den SPG a fhaomhadh go dtí an Cruinniú Boird ar 23 Aibreán, agus nach mbeidh a dhóthain ama ann dul tríd an próiseas iomlán measúnaithe deontais sula dtiocfadh deireadh leis an scéim reatha.

Glacadh leis an mholadh.

D'fhill M. Ní Chonghaile ar an gcruinniú ag an bpointe seo.

Chuir M. Ní Chonghaile in iúl nár aontaigh sí leis an mbreith go raibh baol coimhlint leasa aici sa chás seo. D'fhiosraigh sí an bhféadfadh an Bord athbhreithniú a dhéanamh ar an liosta tosaíochtaí caiteachais don mhaoiniú breise a raibh súil leis. Soiléiríodh gurb é an treoir reatha ó na Ranna ná buiséid Fhoras na Gaeilge a bhunú ar sholáthar 2020, seachas a bheith ag ullmhú le haghaidh ardú buiséid sula gceadaítear é. Míníodh go mbeadh deis ann na tosaíochtaí caiteachais a phlé nuair a bheadh eolas faighte ar an mbuiséad méadaithe, agus aontaíodh go bpléifear an t-ábhar ag an gcéad Chruinniú Boird eile i mí an Mhárta.

Fiosraíodh an bhfuil tuairisc deiridh tionscadail ann don *Concise English-Irish Dictionary*, agus cuireadh in iúl go mbeidh an tuairisc réidh i Ráithe 2.

Ghlac an Bord le Tuairisc na hArdbhainistíochta.

07.186 TUAIRISC Ó CHOISTÍ FHORAS NA GAEILGE

1) Coiste na nDeontas

Thug cathaoirleach an Choiste cuntas ar na moltaí ón gCoiste. Cuireadh in iúl nach raibh cruinniú den Choiste ann de bharr nach raibh ach aon iarratas amháin le plé.

Leasuithe Buiséid 2020

Thug an Bord suntas do leasuithe buiséid 2020 le haghaidh Gaeloideachas, an tÁisaonad, agus Cumann na bhFiann.

Tionscadal Léitheoireachta 2021-2025

Ceadaíodh an moladh go gcuirfí €40,000 in aghaidh na bliana ar fáil do Chomhar ar mhaithe le tionscadal léitheoireachta a bhainistiú don tréimhse 2021-2025. Soiléiríodh go n-íocfar an deontas seo ó bhuiséid Chlár na Leabhar Gaeilge.

Glacadh briseadh 15 nóiméad ag an bpointe seo.

08.186 BALLRAÍOCHT CHOISTÍ AN BHOIRD

Cuireadh in iúl gur faoin gCathaoirleach atá sé ballraíocht na gCoistí a shocrú, agus de bharr nach gceapfar Cathaoirleach go dtí deireadh mhí an Mhárta, chuir an Leas-Chathaoirleach cur chuige molta faoi bhráid an Bhoird chun ballraíocht na gCoistí a shocrú ar bhonn eastramhach. Glacadh leis an gcur chuige molta.

Fiosraíodh an féidir réimsí oibre na gCoistí a athbhreithniú nó coistí eile a bhunú agus dearbhaíodh go bhfuil soláthar ann dó sin sna Buan-Orduithe. Moladh go gcuirfeadh an Coiste Forbartha tuairisc faoi bhráid an Bhoird ag an gcéad Chruinniú Boird eile ina leith seo.

09.186 PLEAN CORPARÁIDEACH FHORAS NA GAEILGE 2020-2022

Thug an Príomhfheidhmeannach cur i láthair ar Phlean Corparáideach Fhoras na Gaeilge 2020-2022, ar phróiseas a dhréachta, ar a leagan amach, agus ar na struchtúir reachtúla a bhaineann lena dhréachtú. Bhí plé ar an ábhar.

10.186 BUAICPHOINTÍ 2020

Thug an Príomhfheidhmeannach cur i láthair ar bhuacphointí Fhoras na Gaeilge 2020.

11.186 RÁITEAS CAITEACHAIS GO 31 NOLLAIG 2020

Chuir an Stiúrthóir Seirbhísí Corparáideacha an Ráiteas Caiteachais go 31 Nollaig 2020 i láthair an chruinnithe agus tugadh cur síos ar leagan amach an Ráitis.

Tugadh suntas do na nithe seo a leanas:

- i. Tá na fuílligh bhainc ag deireadh na bliana níos airde ná a bhíonn de gnáth, agus gurb é Covid-19 an phríomhchúis leis sin;
- ii. Bhí díolachán ÁIS in 2020 níos airde ná 2019, agus go bhfuil sin suntasach sa chomhthéacs gur dúnadh trádstóras ÁIS de réir na chéad dianghlasála i Ráithe 2 2020;
- iii. Níor éiligh Foras na Gaeilge c€162,000 ó na Ranna Urraíochta agus sciar dheireadh na bliana á chur isteach in 2020 de bharr impleachtaí a bhain le Covid-19.

Faomhadh an Ráiteas Caiteachais.

12.186 COMHFHREAGRAS

Cuireadh in iúl go bhfuarthas comhfhreagras ó Chathaoirleach Chumann Chluain Ard, agus go bhfuil an Feidhmeannas ag plé leis. Dearbhaíodh gurb í an tuairisc chéanna í ó 2018 a bhí i gceist a cuireadh faoi bhráid an Bhoird cheana.

Iarradh an comhfhreagras a roinnt leis an mBord.

Iarradh ar an bhfeidhmeannas breathnú ar chur chuige chun comhfhreagras cuí a roinnt leis an mBord don chéad chruinniú eile.

13.186 CRUINNITHE BOIRD 2021

Roinneadh na dátaí le haghaidh Cruinnithe Boird in 2021 leis an mBord mar eolas. Cuireadh in iúl gur ar Zoom a reáchtálfar na cruinnithe go dtí go gcloisfear a mhalairt de threoir.

14.186 AON GHNÓ EILE

Iarradh uasdátú ar staid reatha na luachála ar an gCur Chuige Comhpháirtíochta, agus cuireadh in iúl go bhfuil dréacht-thuairisc faighte. Cuireadh in iúl go bpléifear an luacháil ag an gcéad Chruinniú Boird eile tríd an gCoiste Forbartha.

Pléadh ról Fhoras na Gaeilge mar eagraíocht stáit chun éileamh a dhéanamh le haghaidh seirbhísí gairmiúla trí mheán na Gaeilge, agus an chaoi a n-éascaíonn sé sin an t-éileamh sin ag leibhéal an phobail i gcoitinne. Soiléiríodh go mbíonn an Ghaeilge lárnach i próisis sholáthar Fhoras na Gaeilge. Iarradh ar an fheidhmeannas moltaí ina leith seo a thabhairt chuig an mBord.

Barra Ó Muirí
Leas-Chathaoirleach
12 Márta 2021

Tinreamh ag Cruinnithe Boird in 2021

	29/01/ 2021	01/03/ 2021*	12/03/ 2021	23/04/ 2021	11/06/ 2021	30/07/ 2021	17/09/ 2021	29/10/ 2021
Barra Ó Muirí	✓							
Conor McGuinness	✓							
Maighréad Ní Chonghaile	✓							
Máire Ní Neachtain	✓							
Sorcha Ní Chéide	✓							
Niall Ó Gallochobhair	✓							
Daithí Mac Cárthaigh	✓							
Wuraola Majekodunmi	✓							
Neasa Ní Chiaráin	✓							
Liam Rushe	✓							
Liadh Ní Riada	✓							
Doiminic Ó Brolcháin	✓							
Caoimhín Mac Giolla Mhín	✓							
Kevin Ó hEadhra	✓							

* Cruinniú Speisialta den Bhord

Miontuairiscí ón gCruinniú Speisialta den Bhord a tionóladh Dé Luain 01 Márta 2021 ar líne ar Zoom

I láthair: B. Ó Muirí (Leas-Chathaoirleach), M. Ní Neachtain, C. McGuinness, S. Ní Chéide, M. Ní Chonghaile, N. Ó Gallochobhair, W. Majekodunmi, D. Mac Cárthaigh, N. Ní Chiaráin, D. Ó Brolcháin, K. Ó hEadhra, L. Ní Riada, L. Rushe, C. Mac Giolla Mhín.

Ag freastal: S. Ó Coinn (Príomhfheidhmeannach), E. Ní Chorráin (Leas-Phríomhfheidhmeannach), É. Ó hArgáin (Rúnaí), S. Ó hEidhin, J. Ó Labhraí agus K. Johnston.

01. FÁILTE AN LEAS-CHATHAOIRLIGH AGUS LEAGAN AMACH AN CHRUINNITHE A MHÍNIÚ

Chuir an Leas-Chathaoirleach fáilte roimh Chomhaltaí Boird chuig an gcruinniú atá á reáchtáil ar Zoom de bharr ghéarchéim Covid-19, agus gabhadh buíochas leis na Comhaltaí as a dtacaíocht maidir le socrú breise a dhéanamh i dtaobh cruinnithe éagsúla le linn na héigeandála.

Rinne an Leas-Chathaoirleach cur síos ar leagan amach an chruinnithe. Cuireadh in iúl go bhfuil plé an chruinnithe seo dírithe go príomh ar an bhféidearthacht go gceadóidh an CATT ardú buiséid bonnlíne d'Fhoras na Gaeilge, agus go mbeidh na Ranna Urraíochta ag iarraidh a fheiceáil go bhfuil plean ag Foras na Gaeilge maidir le conas a chaithfeadh sé an buiséad méadaithe sin.

02. PLÉCHÁIPÉISÍ A CHUR I LÁTHAIR

Chuir an Príomhfheidhmeannach na plécháipéisí i láthair an chruinnithe.

Cuireadh in iúl gur iarr na Ranna Urraíochta go leasófaí tagairt i ráiteas físe Fhoras na Gaeilge sa Phlean Corparáideach ó 'ar fud na tíre' go 'ar fud an oileáin', sula gcuirfí an cháipéis faoi bhráid an CATT. Ghlac an Bord leis an athrú seo. Iarradh cóip den Phlean Corparáideach leasaithe a chur ar fáil don Bhord.

03. BAOL COIMHLINTÍ LEASA

Cláraíodh baol coimhlintí leasa mar seo a leanas:

- B. Ó Muirí, M. Ní Chonghaile agus C. McGuinness i leith an Scéim Pobal Gaeilge;
- W. Majekodunmi i leith Ráidíó na Life; agus
- D. Ó Brolcháin agus D. Mac Cárthaigh i leith Chonradh na Gaeilge;

D'iarr M. Ní Chonghaile é a nótaíl sna miontuairiscí nár aontaigh sí le polasaí Fhoras na Gaeilge i leith baol coimhlintí leasa, ach go raibh sí toilteanach cloí leis ina ainneoin sin.

Chuir M. Ní Neachtain agus S. Ní Chéide in iúl go raibh baol coimhlint leasa féideartha acu, dá mbeadh plé ar thacaíocht bhreise do chompántais drámaíochta nó mór-imeachtaí ealaíon, agus dá dtiocfadh sin chun cinn go dtarraingeodh siad siar ón bplé.

04. PLÉ I NGRÚPAÍ AR NA PLÉCHÁIPÉISÍ

Scagadh na Comhaltaí i dtrí sheomra plé chun na plécháipéisí a phlé.

05. TUIRISCIÚ Ó NA GRÚPAÍ

Thug an Comhalta tuairisceora ar Ghrúpa 1 cuntas ar na nithe a phléigh an grúpa. Tugadh suntas do na pointí seo a leanas:

1. Go bhfuil bearna sa soláthar a dhéanann Foras na Gaeilge chun an Ghaeilge a chur chun cinn i measc an phobail inimirce ar an oileán, agus go bhféadfaí léirithe spéise a lorg ó na Ceanneagraíochtaí chun tabhairt faoin réimse sin;
2. Go bhfuil tosaíocht le leagan ar an luach ar airgead a fhaigheann Foras na Gaeilge ar a chuid caiteachais ar na Ceanneagraíochtaí, agus gur chóir coinníollacha a leagan ar aon deontaí reatha lena chinntiú go n-úsáidfidís aon mhaoiniú breise a cheadófaí dóibh chun freastal ar an bpobal ar bhonn uile-oileáin, go háirithe i réimse na hóige agus maidir le chur chun cinn na Gaeilge i scoileanna meáin Bhéarla ó thuaidh;
3. Fiosraíodh arbh fhiú fordheontas a chur ar fáil do naíonraí lán-Ghaeilge, a dhéanfadh coinníollacha oibre cúram leanaí trí mheán na Gaeilge ní ba tharraingtí, agus dá réir sin, oibríthe le caighdeán ard Gaeilge a mhealladh;
4. Moladh a bheith cinnte faoi na torthaí má bhí infheistíocht bhreise le déanamh i réimse na margaíochta agus caidrimh phoiblí;
5. Gurbh fhiú foinsí eile maoinithe a fhiosrú i dtaca le foclóirí agus foilseacháin; agus
6. Gur thacaigh an grúpa go sonrach leis an Scéim Pobal Gaeilge mar scéim de chuid Fhoras na Gaeilge, agus gur mheas sé gur chóir tacaíocht chuí a chur ar fáil don scéim.

Thug an Comhalta tuairisceora ar Ghrúpa 2 cuntas ar na nithe a phléigh an grúpa. Tugadh suntas do na pointí seo a leanas:

1. Go bhfuil tosaíochtaí deacair a mheas gan pleananna na n-eagras ábhartha ar fáil;
2. Go bhfuil difríocht shuntasach idir na riachtanais tacaíochta atá ag imeachtaí fíorúla agus atá ag imeachtaí fisiciúla, agus gur chóir cur chuige idirdhealaithe a bheith ag Foras na Gaeilge chun tacú leis na riachtanais sin;
3. Nach mbeadh sé oiriúnach maoiniú breise a thabhairt do na Ceanneagraíochtaí mura mbeadh sé soiléir go raibh luach maith ar airgead ar fáil;
4. Gurbh fhiú úsáid níos fearr a bhaint as an teicneolaíocht le feasacht a ardú;
5. Go bhfuil soláthar níos fearr do scoláireachtaí Gaeltachta de dhíth;
6. Go bhfuil tuilleadh áiseanna de dhíth ar an bpobal míchumasach; agus
7. Gur chóir dúbailt chaiteachais i réimsí a sheachaint agus comhoibriú éifeachtach idir eagrais a chothú, go háirithe i réimse na pleanála teanga.

Thug an Comhalta tuairisceora ar Ghrúpa 3 cuntas ar na nithe a phléigh an grúpa. Tugadh suntas do na pointí seo a leanas:

1. Go bhfuil na réimsí cearta clúdaithe ag na plécháipéisí, ach go dteastaíonn breis maoinithe ar réimsí éagsúla thar réimsí eile;
2. Go mbeadh sé tábhachtach go bhfeicfí an leas don phobal i gcaiteachas breise ar bith;
3. Go bhfuil an soláthar buiséid do chlár Cumarsáide agus Margaíochta níos mó ná an soláthar don dá Ionad Gaeilge ó thuaidh, agus go mbeadh ciste níos mó de dhíth don réimse seo;

4. Go bhfuil tuilleadh áiseanna de dhíth ar an bpobal míchumasach; agus
5. Gur thacaigh an grúpa go sonrach leis an Scéim Pobal Gaeilge mar scéim, agus gur mheas sé gur chóir tacaíocht chuí a chur ar fáil de réir mar a leomhfadh an buiséad don scéim.

Ardaíodh ceist sa phlé an mbeadh sé níos fearr an méadú iomlán a chaitheamh ar líon beag réimsí seachas iarracht a dhéanamh raon leathan réimsí a chlúdach.

06. EOLAS AR AN MBEALACH CHUN TOSAIGH

Ghabh an Príomhfheidhmeannach a bhuíochas leis na Comhaltaí as ucht a gcuid aiseolais. Chuir sé in iúl go bhfuil an Fheidhmeannas ag iarraidh an t-aiseolas seo a phósadh leis an aiseolas ó Chlárbhainisteoirí Fhoras na Gaeilge agus go gcuirfí moladh faoi bhráid an Bhoird ag an gcéad Chruinniú Boird eile ar 12 Márta 2021.

07. SEISIÚN GAN FHEIDHMEANNAS

Bhí seisiún gan Fheidhmeannas ag an mBord.

Barra Ó Muirí
Leas-Chathaoirleach
12 Márta 2021

Tinreamh ag Cruinnithe Boird in 2021

	29/01/ 2021	01/03/ 2021*	12/03/ 2021	23/04/ 2021	11/06/ 2021	30/07/ 2021	17/09/ 2021	29/10/ 2021	10/12/ 2021
Barra Ó Muirí	✓	✓							
Conor McGuinness	✓	✓							
Maighréd Ní Chonghaile	✓	✓							
Máire Ní Neachtain	✓	✓							
Sorcha Ní Chéide	✓	✓							
Niall Ó Gallochobhair	✓	✓							
Daithí Mac Cárthaigh	✓	✓							
Wuraola Majekodunmi	✓	✓							
Neasa Ní Chiaráin	✓	✓							
Liam Rushe	✓	✓							
Liadh Ní Riada	✓	✓							
Doiminic Ó Brolcháin	✓	✓							
Caoimhín Mac Giolla Mhín	✓	✓							
Kevin Ó hEadhra	✓	✓							

* Cruinniú Speisialta den Bhord

Miontuairiscí ón 187ú Cruinniú Boird a tionóladh Dé hAoine 12 Márta 2021 ar líne ar Zoom

I láthair: B. Ó Muirí (Leas-Chathaoirleach), M. Ní Neachtain, C. McGuinness, S. Ní Chéide, M. Ní Chonghaile, W. Majekodunmi, D. Mac Cárthaigh, N. Ní Chiaráin, D. Ó Brolcháin, K. Ó hEadhra, L. Ní Riada agus C. Mac Giolla Mhín.

Ag freastal: S. Ó Coinn (Príomhfheidhmeannach), E. Ní Chorráin (Leas-Phríomhfheidhmeannach), É. Ó hArgáin (Rúnaí), S. Ó hEidhin, J. Ó Labhraí agus K. Johnston.

Leithscéalta: N. Ó Gallochobhair agus L. Rushe.

FÁILTE ÓN LEAS-CHATHAOIRLEACH

Chuir an Leas-Chathaoirleach fáilte roimh na Comhaltaí Boird chuig an gcruinniú atá á reáchtáil ar Zoom, de bharr ghéarchéim Covid-19, agus gabhadh buíochas leis na Comhaltaí as a dtacaíocht maidir le socrú breise a dhéanamh i dtaobh cruinnithe éagsúla le linn na héigeandála. Cuireadh in iúl go rabhthas ag súil go gceapfaí Cathaoirleach agus Comhalta eile ar an mBord ag an gcéad chruinniú eile den Chomhairle Aireachta Thuaidh-Theas (CATT) ar an 31 Márta.

Chuir an Cathaoirleach in iúl gurb ionann trian de bhallraíocht reatha an Bhoird agus córam ag cruinnithe den Bhord, agus go gciallaíonn sin cúigear Comhaltaí faoi láthair.

Thagair an Príomhfheidhmeannach do scéal sna meáin maidir le Foras na Gaeilge agus bhí plé ina leith. Mhínigh an Príomhfheidhmeannach an dochar a d'fhéadfaí a bheith déanta do dhea-cháil Fhoras na Gaeilge nuair a chuirtear scéalta chuig na meáin gan sin a údarú roimhe ré. Chuir sé in iúl go raibh foireann uile Fhoras na Gaeilge i dteideal a bheith ag déanamh a gcuid oibre gan na meáin a bheith á n-úsáid le brú a chur orthu. Mhínigh sé gurb é an nósmaireacht a bhí ann aon phlé leis na meáin a bhainistiú trí Chlárbhainisteoir Cumarsáide Fhoras na Gaeilge, an Príomhfheidhmeannach agus an Cathaoirleach, seachas cur chuige ad hoc. Mheabhraigh sé gur aontaíodh leis an mBord cheana go lorgóidh an Feidhmeannas oiliúint trí Ghaeilge don Bhord, ach go mbeadh am ag teastáil chun na próisis chúí soláthair a chur i gcrích, agus gur údar díomá é nár tugadh deis don fhoireann tabhairt faoi na próisis sin mar ba cheart.

Pléadh an easpa treorach atá ag an mBord i dtaca le cúrsaí cumarsáide i láthair na huaire agus aontaíodh go gcuirfí cáipéis ar fáil ag an gcéad Chruinniú Boird eile a shoiléireodh cumarsáid idir Foras na Gaeilge agus na meáin.

01.187 MIONTUAIRISCÍ

Glacadh le miontuairiscí an Chruinnithe Boird ar an 29 Eanáir 2021, agus le miontuairiscí an Chruinnithe Speisialta den Bhord ar an 01 Márta 2021.

02.187 NITHE AG ÉIRÍ AS NA MIONTUAIRISCÍ

Tháinig S. Ní Chéide i láthair an chruinnithe ag an bpointe seo.

Iarradh nuashonrú ar an teagmháil le Cumann Chluain Ard. Cuireadh in iúl gur scríobhadh litir agus go bhfuil muid ag fanacht ar fhreagra le cruinniú a shocrú.

Fiosraíodh an cur chuige maidir le comhfhreagras a thuairisciú don Bhord. Aontaíodh, seachas sa chás go n-iarrfadh údar litreach go gcuirfí a litir faoi bhráid an Bhoird, go ndéanfadh an Príomhfheidhmeannach, i gcomhairle leis an gCathaoirleach cinneadh maidir le comhfhreagras a thuairisciú don Bhord.

Iarradh nuashonrú maidir leis an luacháil iarthionscadail ar an bhFoclóir Nua Béarla-Gaeilge. Cuireadh in iúl go mbeidh an tuairisc réidh faoi dheireadh Mheithimh.

Pléadh minicíocht na seisiún gan an feidhmeannas i láthair, agus aontaíodh go mbeidh seisiún gan feidhmeannas ag deireadh gach dara cruinniú.

03.187 BAOL COIMHLINTÍ LEASA

Cuireadh in iúl go bhfuil na baoil coimhlint leasa seo a leanas ag comhaltaí:

- B. Ó Muirí i dtaca leis an Scéim Pobal Gaeilge;
- C. McGuinness i dtaca leis an Scéim Pobal Gaeilge; agus
- Chuir M. Ní Chonghaile in iúl nár léir di go bhfuil Scéim Pobal Gaeilge ar chlár an chruinnithe, ach go n-imeodh sí dá mbeadh plé le déanamh uirthi.

Bhí roinnt Comhaltaí míchompórdach leis an gcaoi a gcuirtear an polasaí coimhlint leasa i bhfeidhm, agus iarradh go n-iarrfaí ar shaineolaí neamhspleách tuairim a léiriú ar an bpolasaí.

04.187 COVID-19

Thug an Stiúrthóir Seirbhísí Corparáideacha tuairisc maidir le socrúithe Fhoras na Gaeilge i dtaca le Covid-19. Tugadh suntas do na pointí seo a leanas:

- i. Tá beagán athruithe le tuairisciú ón uair dheiridh gur cuireadh tuairisc ar an ábhar seo i láthair an Bhoird;
- ii. Níl ach oibrí thrádstóras ÁIS ag obair ar an láthair oibre faoi láthair;
- iii. Is é an 05 Aibreán dáta athbhreithnithe an Rialtais ar shocrúithe dianghlasála ó dheas;
- iv. Tá Foras na Gaeilge réidh chun na hoifigí a oscailt go sábháilte a fhad is atá cead tugtha ag na rialtais ina leith; agus
- v. Tá pleanáil a dhéanamh ar an gcianobair mar shocrú meán- agus fad-téarmach ó thaobh bainistíocht foirne de.

05.187 TUAIRISC NA hARDBHAINISTÍOCHTA

Chuir an Príomhfheidhmeannach Tuairisc na hArdbhainistíochta i láthair agus bhí plé ina leith.

Fiosraíodh ar chóir don fhoireann cruinnithe a bheith acu le heagraíochtaí atá ag fáil maoiniú uainn, chun plé a dhéanamh ar thosaíochtaí maoinithe Fhoras na Gaeilge. Míníodh go raibh sé de nós ag an bhfoireann bualadh le réimse leathan páirtithe leasmhara lena dtuairimí a fháil ar raon ceisteanna mar chuid dár bpróisis neamhfhoirmiúla chomhairliúcháin.

Iarradh soiléiriú maidir leis an gconradh d’obair chorpais foclóireachta. Soiléiríodh gurb é an cur chuige is éifeachtaí é ó thaobh cuid mhór cinntí foclóireachta ná leas a bhaint as fianaise chorpais. Tuairiscíodh go bhfuil tionscadal mór chorpais ar bun ag Fiontar DCU cheana féin, agus go bhfuil an rannóg foclóireachta ag iarraidh leas a bhaint as an tionscadal sin le cur leis an gcorpas foclóireachta atá ar fáil acu. Tá faomhadh Boird ag teastáil inniu chun an conradh a cheadú.

Iarradh eolas faoin gCiste Tionscadail agus cuireadh in iúl go bhfuil soláthar de €60,000 ann faoi láthair, go raibh súilíocht ann go bhféadfaí cur leis, agus go mbeidh an Ciste á oscailt i gceann seachtaine.

Fiosraíodh an mbeadh Coiste Colmcille á athbhunú agus cuireadh in iúl go mbeadh cinneadh le déanamh i leith na gcoistí uile nuair a bheidh Cathaoirleach nua ceaptha ar an mBord.

Ghlac an Bord le Tuairisc na hArdbhainistíochta.

Cheadaigh an Bord na conarthaí seo a leanas faoi scáth Thuairisc na hArdbhainistíochta

- a) Conradh le Grúpa Taighde Gaois, Fiontar & Scoil na Gaeilge (DCU) chun Céim 3 den Chorpas Taighde Foclóireachta a chur i gcrích;
- b) Síneadh 6 mhí ar an gconradh le Richardsons’ chun ábhar poiblíochta a sholáthar;
- c) Síneadh 6 mhí ar an gcomhaontú le bainisteoir tionscadail an Fhoclóra.

06.187 TUAIRISC Ó CHOISTÍ FHORAS NA GAEILGE

a) Coiste na nDeontas

Thug Cathaoirleach an Choiste cuntas ar na nithe a pléadh ag an gcuinniú de Choiste na nDeontas ar an 26 Feabhra 2021. Cuireadh in iúl gur roghnaíodh S. Ní Chéide mar Chathaoirleach an Choiste agus L. Ní Riada mar Leas-Chathaoirleach.

Moladh mion-leasú amháin ar Théarmaí Tagartha reatha an Choiste agus aontaíodh go ndéanfaí athbhreithniú orthu arís i lár na bliana seo nuair a bheidh baill an Choiste socraithe isteach i ngnó an Choiste.

Leasuithe Buiséid

Thug an Bord suntas do leasuithe buiséid le haghaidh Gaeloideachas.

Tuairisc ar Impleachtaí Covid-19 ar Scéimeanna Fhoras na Gaeilge 2021

Thug an Bord suntas don tuairisc ar na pleananna le dul i ngleic le himpleachtaí Covid-19 ar Scéimeanna Fhoras na Gaeilge 2021.

Gradam Foilsitheoireachta 2021

Cheadaigh an Bord maoiniú imfhálaithe ar luach €27,000 d'Oireachtas na Gaeilge chun na Gradaim Foilsitheoireachta 2021 a riaradh.

Plean Teagmhais do Scéim na Scoláireachtaí Gaeltachta 2020-2022

Cheadaigh an Bord an plean teagmhais go gcuirfí síneadh bliana le Scéim Scoláireachtaí Gaeltachta 2020-2022 sa chás go gcuirfí na cúrsaí Gaeltachta ar ceal i mbliana de bharr Covid-19, agus go gcaithfí soláthar 2021 don scéim ar an scéim in 2023.

b) An Coiste Forbartha

Thug Cathaoirleach an Choiste cuntas ar na nithe a pléadh ag an gcruinniú den Choiste Forbartha ar an 03 Márta 2021. Tugadh suntas do na pointí seo a leanas:

- Roghnaíodh M. Ní Neachtain mar Chathaoirleach an Choiste, agus roghnaíodh W. Majekodunmi mar Leas-Chathaoirleach an Choiste;
- Glacadh le Téarmaí Tagartha reatha an Choiste agus aontaíodh go ndéanfaí athbhreithniú orthu i lár na bliana seo nuair a bheidh baill an Choiste socraithe isteach i ngnó an Choiste;
- Tugadh nuashonrú ar an Scéim Pobal Gaeilge agus ar phleananna don scéim a leanfadh í, Scéim Forbartha Líonraí Gaeilge 2022-2024;
- Ghlac an Coiste leis an chéad tuairisc luachála ar an gCur Chuige Comhpháirtíochta, atá le cur faoi bhráid an Bhoird ag an gcruinniú Boird inniu;
- Mhol an Cathaoirleach Plean Gnó 2021 don Bhord; agus ghlac an Bord leis; agus
- Aontaíodh an t-athbhreithniú ar réimsí oibre Choistí uile an Bhoird a moladh ag Cruinniú Boird an 29 Eanáir 2021 a chur siar go lár na bliana nuair a bheidh an Bord iomlán socraithe isteach i ngnó na gCoistí.

An Luacháil ar an gCur Chuige Comhpháirtíochta

Chuir an Leas-Phríomhfheidhmeannach an tuairisc luachála i láthair an Bhoird. Léirigh Comhaltaí a ndíomá maidir leis na heasnamh sa tuairisc, agus chuir siad in iúl gur mheas siad go raibh na gnéithe ba tábhachtaí fágtha ar lár. Aithníodh go raibh fiúntas leis na moltaí a bhain leis na gnéithe den luacháil ar tugadh fúthu sa tuairisc, agus gur gá glacadh léi mar a bhí, agus iarracht a dhéanamh saineolaithe a fhostú le tabhairt faoi na bearnaí. Cuireadh in iúl go bhfuil plean forfheidhmithe á fhorbairt faoi láthair le dul i ngleic leis na heasnamh sa tuairisc, agus go bhfuil painéal á chur le chéile de dhaoine agus chomhlachtaí le Gaeilge a mbeadh an saineolas acu le tabhairt faoin obair sin.

Tugadh le fios, cé go raibh moill leis an luacháil, go raibh an Cur Chuige Comhpháirtíochta ag feidhmiú mar a beartaíodh, agus obair mhaith á cur i gcrích thar na réimsí uile.

Léirigh Comhaltaí frustrachas leis an moill ar an luacháil - nach mbeadh sí curtha i gcrích roimh an mheasúnú ar iarratais 2022. Léirigh roinnt Comhaltaí a mbuairt maidir le feidhmíocht an Chur Chuige Chomhpháirtíochta.

Glacadh leis an tuairisc luachála ar an gCur Chuige Comhpháirtíochta.

c) An Coiste Iniúchta

Thug Cathaoirleach an Choiste cuntas ar na nithe a pléadh ag an gcruinniú den Choiste Iniúchta 05 Márta 2021. Tugadh suntas do na pointí seo a leanas:

- Roghnaíodh C. McGuinness mar Chathaoirleach an Choiste agus roghnaíodh L. Rushe mar Leas-Chathaoirleach an Choiste;
- Glacadh leis na Téarmaí Tagartha reatha agus cinneadh go ndéanfaí athbhreithniú orthu i lár na bliana seo nuair a bheas baill an Choiste socraithe isteach i ngnó an Choiste;
- Ceapadh R. Mac Pháidín agus R. Mac Fhionnlaoich mar bhaill sheachtracha don tréimhse eatramhach;
- Chuir an tIniúcháir Inmheánach trí thuairisc faoi bhráid an Choiste; agus
- Tugadh suntas dó nach bhfuil stocáireamh tús bliana déanta ag ÁIS i mbliana i bhfianaise na srianta COVID-19 agus go bhfuil stocáireamh beartaithe le haghaidh pointe níos oiriúnaí i lár na bliana; agus
- Ghlac an Coiste leis an gClár Rioscaí, atá le cur faoi bhráid an Bhoird ag an gcruinniú Boird inniu.

Ghabh Cathaoirleach an Choiste a bhuíochas le M. Ní Neachtain as an méid a rinne sí agus í ina Cathaoirleach ar an gCoiste Iniúchta roimhe.

07.187 AN CLÁR RIOSCAÍ

Chuir an Stiúrthóir Seirbhísí Corparáideacha an Clár Rioscaí i láthair an Bhoird agus rinne sé cur síos ar a leagan amach agus ar an mbealach a gcuirtear le chéile é.

Glacadh leis an gClár Rioscaí.

Glacadh briseadh 15 nóiméad ag an bpointe seo.

08.187 DRÉACHT-PHLEAN GNÓ 2021 AGUS BUISÉAD 2021

Cuireadh an leagan leasaithe den Phlean Corparáideach 2020-2022 faoi bhráid an Bhoird mar eolas agus glacadh leis.

Chuir an Stiúrthóir Seirbhísí Corparáideacha Dréacht-Phlean Ghnó 2021 agus Buiséad 2021 i láthair an Bhoird. Cuireadh in iúl go bhfreagraíonn an Plean Gnó don Phlean Corparáideach, agus go bhfreagraíonn an Plean Corparáideach don Treo Straitéiseach 5 bliana atá ag Foras na Gaeilge, agus don Straitéis 20 bliain don Ghaeilge araon. Soiléiríodh go bhféadfadh go mbeidh gá an Plean Gnó a leasú le linn na bliana de bharr cúinsí eisceachtúla a bhaineann le Covid-19, agus go gcuirfear na leasuithe sin faoi bhráid an Bhoird le faomhadh má thagann siad chun cinn.

Pléadh an dá cháipéis agus ardaíodh roinnt ceisteanna fúthu. Soiléiríodh go bhfuil an buiséad bunaithe ar an soláthar reatha, agus nach mbeidh torthaí an phlé maidir le tosaíochtaí caiteachais le feiceáil air go dtiocfaidh méadú ar bhuiséad Fhoras na Gaeilge. Cuireadh in iúl go mbeadh an buiséad méadaithe sin le faomhadh ag an gcruinniú Boird i mí Aibreán, má cheadaíonn an Chomhairle Aireachta Thuaidh-Theas ardú buiséid d'Fhoras na Gaeilge.

Pléadh deacrachtaí pleanála a bhaineann le tearc-chaiteachas, agus cuireadh in iúl go bhfuil socruithe in áit chun dul i ngleic leis na deacrachtaí sin, lena n-áirítear an próiseas athdháilte, tacaíocht a thabhairt do dheontaithe agus iad ag athdhréachtadh pleananna, agus teagmháil leanúnach leis na Ranna Urraíochta chun fuílligh bainc agus imfhálú buiséid a phlé.

D'fhaomh an Bord an Dréacht-Phlean Gnó 2021 agus Buiséad 2021.

D'fhág D. Mac Cárthaigh an cruinniú ag an bpointe seo.

09.187 RÁITEAS CAITEACHAIS GO 28 FEABHRA 2021

Chuir an Stiúrthóir Seirbhísí Corparáideacha an Ráiteas Caiteachais go 28 Feabhra 2021 i láthair an Bhoird agus bhí plé ina leith.

Cuireadh in iúl go bhfuil ioncam trádála ÁIS rud beag ar gcúl sa chéad dá mhí den bhliain i gcomparáid le mar a bhí anuraidh.

Faomhadh an Ráiteas Caiteachais.

Ghlac an Bord leis an tuairisc ar cheangaltais deontas Fhoras na Gaeilge amhail 31/12/2020, agus leis an tuairisc ar dhíscríobh deontas Fhoras na Gaeilge le linn 2020.

D'fhág D. Ó Brolcháin agus C. McGuinness an cruinniú ag an bpointe seo.

10.187 TOSAÍOCHTAÍ CAITEACHAIS

Chuir an Príomhfheidhmeannach moltaí maidir le tosaíochtaí caiteachais i láthair an Bhoird agus bhí plé ina leith.

Cuireadh in iúl go bhfuil tosaíochtaí caiteachais á bplé sa chomhthéacs go bhféadfadh an CATT ardú a cheadú do bhuiséad bonnlíne Fhoras na Gaeilge ag deireadh na míosa. Meabhraíodh do Chomhaltaí gur plé straitéiseach é an plé seo faoi phatrúin agus thosaíochtaí caiteachais ar bhonn ginearálta sa chás go gceadófaí méadú ar an bhuiséad bonnlíne, seachas plé ina ndéanfar gealltanais dhaingne maidir le caiteachas. Soiléiríodh nach mbaineann an plé le buiséad 2021, ach le buiséid sna blianta atá romhainn.

Pléadh ardú maoinithe do na Ceanneagraíochtaí i gcomhthéacs na gceisteanna a ardaíodh cheana. Míníodh gurb iad baill foirne na gCeanneagraíochtaí na daoine is mó atá ag obair ag leibhéal an phobail, go bhfuil tuarastal na bhfoirne sin leagtha amach de réir ciorcláin phá, agus go bhfuil na Ceanneagraíochtaí ag plé leis na ciorruithe chéanna agus atá Foras na Gaeilge le tamall de bhlianta anuas, rud a fhágann an éagothroime sin idir costais gníomhaíochta agus costais tuarastail sna Ceanneagraíochtaí. Soiléiríodh chomh maith go bhfuil an líon foirne atá ag cuid de na Ceanneagraíochtaí beag, agus go bhfuil an líon foirne sin ina bhac ó thaobh clár leathan gníomhaíochtaí a chur i gcrích ar fud an oileáin. Cuireadh in iúl nach réiteofaí na deacrachtaí sin trí bhreis ciorruithe a chur i bhfeidhm ar mhaoiniú na gCeanneagraíochtaí.

Pléadh an soláthar le haghaidh scéim tacaíochta do na hIonaid Ghaeilge, agus Scéim Forbartha Líonraí Gaeilge. Cuireadh in iúl go bhfuil sé deacair éileamh a mheas ag an bpointe seo do na hIonaid Ghaeilge, agus go mbeidh deis ann an soláthar don Scéim Forbartha Líonraí Gaeilge a scrúdú i dtéarmaí níos mionsonraithe ag an gcéad Chruinniú Boird eile nuair a bheidh buiséad Fhoras na Gaeilge deimhnithe ag an gCATT. Fiosraíodh ar chóir an maoiniú breise atá molta do na Ceanneagraíochtaí a chur i dtreo Scéim Ionad.

Fiosraíodh faoin dóigh a gcuirfí an plé ag an gCruinniú Speisialta den Bhord faoin inimirce agus faoin gcaighdeán Gaeilge sna naíonraí sna áireamh sna tosaíochtaí caiteachais. Cuireadh in iúl nach féidir le Foras na Gaeilge baill foirne sa bhreis a cheapadh gan cead ar leith ón CATT, ach go bhféadfaí plé leis an bpopal inimirce trí cheann de na Ceanneagraíochtaí. Cuireadh in iúl chomh maith go bhfuil spéis léirithe ag Gaeloideachas i dtionscadal ar leith a dhíreodh ar chaighdeán na Gaeilge sna naíonraí. Tagraíodh do na gníomhaíochtaí a bhíonn ar bun ag Foras na Gaeilge i réimse an ghnó, agus dearbhaíodh go bhfuil plé ar bun faoi na gníomhaíochtaí sin ar fad a chomhordú le hobair Ghlór na nGael sa réimse.

Iarradh ar an bhFeidhmeannas pleananna oibre i réimse na foclóireachta a roinnt leis an mBord mar eolas do na Comhaltaí nuacheaptha go háirithe.

Glacadh leis na moltaí maidir le tosaíochtaí caiteachais.

D'fhág S. Ní Chéide an cruinniú ag an bpointe seo.

11.187 COMHFHREAGRAS

Ní raibh aon ní le plé faoin mír seo.

12.187 AON GHNÓ EILE

Fiosraíodh an bhfuil sé i gceist go gcuirfidh Foras na Gaeilge aighneacht isteach ar an gcomhairliúchán poiblí de chuid na Comhairle Náisiúnta Curaclaim agus Measúnachta ar shiollabas ardteiste na Gaeilge, agus dhearbhaigh an Leas-Phríomhfheidhmeannach go gcuirfeadh. Chuir roinnt Comhaltaí in iúl go bhfuil aighneachtaí á n-ullmhú ag grúpaí a bhfuil siad bainteach leo, agus cuireadh fáilte rompu dul i dteagmháil leis an Leas-Phríomhfheidhmeannach ar an ábhar. Fiosraíodh an féidir leis an bhForas tacú lena bhfuil iarrtha ag roinnt grúpaí i dtaca le spriodhata an chomhairliúcháin a chur siar.

Tagraíodh do dheacrachtaí atá ann maidir le socrúcháin Ghaeltachta mar chuid d'oiliúint tosaigh ar bhunmhúinteoirí, agus fiosraíodh an féidir le Foras na Gaeilge an cheist a ardú. Cuireadh in iúl go bhfuil cruinniú lorgtha leis an Aire Oideachais, Norma Foley TD, chun an cheist sin agus ábhair eile a phlé.

Cuireadh in iúl go mbeidh Siompóisiam Foclóireachta ar líne á reáchtáil ag Foras na Gaeilge Dé Sathairn 27 Márta agus go scaipfear tuilleadh eolais faoin imeacht ar an mBord an tseachtain seo chugainn.

Barra Ó Muirí

Barra Ó Muirí
Leas-Chathaoirleach
23 Aibreán 2021

Tinreamh ag Cruinnithe Boird in 2021

	29/01/ 2021	01/03/ 2021*	12/03/ 2021	23/04/ 2021	11/06/ 2021	30/07/ 2021	17/09/ 2021	29/10/ 2021	10/12/ 2021
Barra Ó Muirí	✓	✓	✓						
Conor McGuinness	✓	✓	✓						
Maighréd Ní Chonghaile	✓	✓	✓						
Máire Ní Neachtain	✓	✓	✓						
Sorcha Ní Chéide	✓	✓	✓						
Niall Ó Gallochobhair	✓	✓	X						
Daithí Mac Cárthaigh	✓	✓	✓						
Wuraola Majekodunmi	✓	✓	✓						
Neasa Ní Chiaráin	✓	✓	✓						
Liam Rushe	✓	✓	X						
Liadh Ní Riada	✓	✓	✓						
Doiminic Ó Brolcháin	✓	✓	✓						
Caoimhín Mac Giolla Mhín	✓	✓	✓						
Kevin Ó hEadhra	✓	✓	✓						

* Cruinniú Speisialta den Bhord

Miontuairiscí ón 188ú Cruinniú Boird a tionóladh Dé hAoine 23 Aibreán 2021 ar líne ar Zoom

I láthair: B. Ó Muirí (Leas-Chathaoirleach), M. Ní Neachtain, C. McGuinness, S. Ní Chéide, M. Ní Chonghaile, W. Majekodunmi, D. Mac Cárthaigh, N. Ní Chiaráin, D. Ó Brolcháin, K. Ó hEadhra, L. Ní Riada, C. Mac Giolla Mhín, N. Ó Gallochobhair, agus L. Rushe.

Ag freastal: S. Ó Coinn (Príomhfheidhmeannach), E. Ní Chorráin (Leas-Phríomhfheidhmeannach), É. Ó hArgáin (Rúnaí), S. Ó hEidhin, J. Ó Labhraí agus K. Johnston.

Leithscéalta: Ní raibh aon leithscéalta ann.

FÁILTE ÓN LEAS-CHATHAOIRLEACH

Chuir an Leas-Chathaoirleach fáilte roimh na Comhaltaí Boird chuig an gcrúinniú atá á reáchtáil ar Zoom, de bharr ghéarchéim Covid-19, agus gabhadh buíochas leis na Comhaltaí as a dtacaíocht maidir le socruithe breise a dhéanamh i dtaobh cruinnithe éagsúla le linn na héigeandála.

Cuireadh in iúl gur cuireadh cruinniú den Chomhairle Aireachta Thuaidh/Theas (an CATT), a bhí beartaithe do dheireadh mhí an Mhárta, ar athló agus go bhfágann sin nach bhfuil ceapachán déanta ar Chathaoirleach agus Comhalta eile ar an mBord. Cuireadh in iúl gurb ionann cúigear Comhaltaí agus córam ag cruinnithe den Bhord faoi láthair dá bharr.

01.188 MIONTUAIRISCÍ

Glacadh le miontuairiscí an Chruinnithe Boird 12 Márta 2021.

02.188 NITHE AG ÉIRÍ AS NA MIONTUAIRISCÍ

Thug An Stiúirthóir Seirbhísí Foilsitheoireachta, Foclóireachta agus Téarmaíochta, J. Ó Labhraí tuairisc ghairid ó bhéal ar an Siompóisiam Foclóireachta a reáchtáladh 27 Márta ar líne. Cuireadh in iúl gur fhreastail 156 duine ó thíortha éagsúla timpeall an domhain ar an imeacht agus go mbeidh tuairisc níos iomláine ar fáil faoin imeacht agus tuairisc deiridh tionscadail ón rannóg foclóireachta á cur faoi bhráid an Bhoird i mí Iúil. Thug roinnt comhaltaí a bhí i láthair aige ardmholadh don Siompóisiam.

Chuir an Príomhfheidhmeannach in iúl go bhfuil iarratas á dhéanamh faoi láthair páipéir a bhaineann leis an bhForas Teanga a chur le clár cruinnithe eile den CATT agus go bhféadfaí gnó práinneach Fhoras na Gaeilge a ghlanadh ag an gcrúinniú sin in ionad fanacht leis an gcéad chruinniú earnála eile den CATT a bheadh dírithe go sonrach ar chúrsaí teanga, ag brath ar thoil an Aire i gcathaoirleacht an chruinnithe.

Soiléiríodh nach bhfuil eolas maidir le hardú buiséid 2021 deimhnithe d'Fhoras na Gaeilge go fóill, agus go bhfuil sé ag feidhmiú ag leibhéal an bhuiséid a bhí aige in 2020 dá réir.

Iarradh nuashonrú faoin gcomhfhreagras le Cumann Chluain Ard agus cuireadh in iúl nach bhfuil freagra faighte ag Foras na Gaeilge go fóill chun cruinniú a shocrú.

Fiosraíodh an bhfuil ardú soláthair socraithe tríd an athdháileadh go fóill don Chiste Tionscadail agus cuireadh in iúl go bhfuil incháilitheacht na n-iarratas le meas i dtosach lena fháil amach an bhfuil an soláthar reatha dóthanach, ach go bhféadfaí cur leis an soláthar tríd an athdháileadh dá mba ghá. Cuireadh in iúl go bhfuarthas 19 iarratas faoin gCiste.

Iarradh nuashonrú faoin gcruinniú a lorgaíodh leis an Aire Oideachais Norma Foley TD faoi na socrúcháin Ghaeltachta do bhunmhúinteoirí faoi oiliúint, agus faoin gcumarsáid a rinne Foras na Gaeilge leis an Roinn Oideachais faoi dháta dúnta an chomhairliúcháin phoiblí faoin tsonraíocht don ardeist. Cuireadh in iúl nach bhfuil dáta cruinnithe socraithe go fóill leis an Aire Foley, ach go raibh plé ag an bhForas lena hoifigigh agus gur léirigh siad tuiscint ar na deacrachtaí. Cuireadh in iúl gur beag an seans go n-athróidh an Roinn dáta dúnta an chomhairliúcháin.

Thug an Bord cead don Leas-Chathaoirleach litir a scríobh chuig an Aire Foley thar cheann an Bhoird faoi na socrúcháin Ghaeltachta agus faoi chomhairliúchán an CNCM de bharr na práinne a bhaineann leis na cásanna.

03.188 BAOL COIMHLINTÍ LEASA

Cuireadh in iúl go bhfuil baol coimhlint leasa ag na Comhaltaí seo a leanas:

- S. Ní Chéide i dtaca le Scéim na gCompántas Drámaíochta;
- B. Ó Muirí i dtaca leis an Scéim Pobal Gaeilge agus lena comharba, an Scéim Forbartha Líonraí Gaeilge;
- C. McGuinness i dtaca leis an Scéim Pobal Gaeilge agus lena comharba, an Scéim Forbartha Líonraí Gaeilge;
- Chuir M. Ní Chonghaile in iúl go bhfuil baol coimhlint leasa aici i dtaca leis an Scéim Pobal Gaeilge reatha de bharr go bhfuil sí ar choiste stiúrtha ceann de na deontaithe reatha, ach dhiúltaigh sí baol coimhlint leasa a chlárú maidir leis an Scéim Forbartha Líonraí Gaeilge ar an mbonn nach bhfuil an scéim seolta go fóill. Chuir sí in iúl nach bhféadfaí sí an cruinniú nuair a bheadh an Scéim á plé níos déanaí sa chlár.

Pléadh an raon a bheadh ag baol coimhlint leasa i gcás scéim atá á forbairt, agus nach bhfuil cinneadh déanta i dtaobh na ndeontaithe dá bharr. Tarraingíodh aird an Bhoird ar an bhforáil ábhartha sa Pholasáí Coimhlint Leasa don Bhord a phléann leis an gceist áirithe sin, ina moltar do Chomhaltaí tarraingt siar ón bpróiseas plé agus cinnteoireachta i dtaca le scéimeanna atá á bhforbairt, má tá baol coimhlint leasa acu ina leith. Cuireadh in iúl go bhfuil an Scéim Forbartha Líonraí Gaeilge á forbairt chun feidhmiú mar chomharba ar an Scéim Pobal Gaeilge, agus go bhféadfaí glacadh leis go réasúnta go gcuirfidh deontaithe reatha Scéim Pobal Gaeilge isteach uirthi dá bharr.

Cuireadh in iúl go bhfuil oiliúnóir nua don Bhord ceaptha, go bhfuil cúlra aige mar abhcóide, agus go bhféadfaí iarraidh air comhairle a thabhairt don Bhord ar bhaol coimhlint leasa ag an gcéad seisiún oiliúna eile. Chuir an Príomhfheidhmeannach in iúl go bhféadfaí sé comhairle bhreise ó na Ranna a lorg i dtaca leis an gceist seo chomh maith dá mba ghá.

04.188 COVID-19

Thug an Stiúrthóir Seirbhísí Corparáideacha tuairisc maidir le socrúithe Fhoras na Gaeilge i dtaca le Covid-19. Tugadh suntas do na pointí seo a leanas:

- Tá beagán athruithe le tuairisciú ón uair dheiridh a cuireadh tuairisc ar an ábhar seo i láthair an Bhoird;
- Tá súil go bhfógróidh an Rialtas ó dheas a bplean don Samhradh maidir le maolú na dianghlasála an tseachtain seo chugainn;
- Tá súil go n-athróidh stádas na dianghlasála ó thuaidh rud beag níos sciobtha, agus gur féidir oifig Bhéal Feirste a oscailt dá réir sin nuair is ceadmhach; agus
- Beidh nuashonrú níos suntasaí le tabhairt ar an ábhar seo don Bhord faoin gcéad Chruinniú Boird eile.

05.188 RÚN MOLTA ÓN GCOMHALTA K. Ó hEADHRA

Chuir K. Ó hEadhra an rún molta seo a leanas faoi bhráid an Bhoird agus bhí plé ina leith.

In aon ghlaoch ar thairiscintí le seirbhísí gairmiúla rialta/leanúnacha a chur ar fáil d'Fhoras na Gaeilge, beidh an cumas chun seirbhísí a sheachadadh trí mheán na Gaeilge mar chritéir riachtanach.

Más gá soláthraí a fhostú nach féidir an choinníoll seo a shásamh, ba cheart an Bord a chur ar an eolas.

Tacaíodh d'aon ghuth le spiorad an rúin, agus aontaíodh go bpléifeadh an Coiste Iniúchta an rún leis an bhfoclaíocht a bheachtú agus le saincheisteanna soláthair a phlé ina chomhthéacs.

06.188 TUAIRISC NA hARDBHAINISTÍOCHTA

Chuir an Príomhfheidhmeannach Tuairisc na hArdbhainistíochta i láthair an Bhoird agus bhí plé ina leith.

Tugadh suntas don airgead a athdháileadh le linn na bliana go dáta.

Glacadh le Tuairisc na hArdbhainistíochta.

07.188 PRÓTACAL CUMARSÁIDE IDIR AN BORD AGUS NA MEÁIN

Chuir an Stiúrthóir Seirbhísí Corparáideacha dréacht de pholasaí cumarsáide Fhoras na Gaeilge faoi bhráid an Bhoird agus bhí plé ina leith. Cuireadh in iúl go bhfuil an prótacal sa pholasaí a bhaineann leis an mBord ag freagairt do Chód Iompair an Bhoird, agus go nglanfar an polasaí iomlán leis an gCoiste Iniúchta níos déanaí sa bhliain.

Glacadh leis an bprótacal cumarsáide don Bhord.

08.188 TUAIRISC Ó CHOISTÍ FHORAS NA GAEILGE

a) Coiste na nDeontas

Rinne Cathaoirleach an Choiste cur síos ar na nithe a pléadh ag an gcruinniú de Choiste na nDeontas ar an 09 Aibreán 2021.

Moladh faoin gCiste Infheistíochta do Bhunú Soláthair Réamhscolaíochta

Cheadaigh an Bord maoiniú de luach £73,000.00 do Naíscoil na Seolta (2101006) thar an tréimhse Meitheamh 2021-Meitheamh 2023 chun costais bhunaithe na naíscoile a chlúdach.

Bhí plé ann faoin gCiste Infheistíochta do Bhunú Soláthair Réamhscolaíochta. Soiléiríodh gur scéim leanúnach í, go bhfuil na próisis mheasúnaithe mar a bhíonn i gcás scéimeanna eile, go gcuirtear eolas faoin gCiste ar fáil go poiblí ar shuíomh Fhoras na Gaeilge, agus nach mbíonn ach iarratais a bhfuil tacaíocht acu ó na heagraíochtaí cuí réamhscolaíochta agus gaeleoidachais incháilithe faoin gciste. Soiléiríodh gur costais bhunaithe an tsoláthair réamhscolaíochta amháin a bhíonn san áireamh, agus nach mbíonn ceangaltais níos faide ná dhá bhliain i gceist dá bharr sin. Cuireadh in iúl go bhfuil soláthar buiséid ar luach suas go €150,000 ag an gCiste gach bliain, lena n-áirítear ceangaltais ó na blianta roimhe, agus gur minic gur iarratas amháin in aghaidh na bliana a ghlactar dá bharr.

Scéim na gCampáí Samhraidh 2021

Cheadaigh an Bord maoiniú ar luach €3,654.00 agus £50,160.00 do 65 deontaí faoi Scéim na gCampáí Samhraidh 2021 (**Aguisín 1**).

Nóta eolais maidir le Cúram Leanaí na Fuiseoige

Tugadh suntas do shíneadh ama go Nollaig 2021 a cheadaigh an Príomhfheidhmeannach do Chúram Leanaí na Fuiseoige.

Scéim na Foilsitheoireachta 2021

Cheadaigh an Bord ardú maoinithe de luach €5,500.00 do Chomhar faoi Scéim na Foilsitheoireachta 2021 chun forbairt a dhéanamh ar an tionscadal CLÓ – Cló Léann na Gaeilge.

Glaoch 2 de Scéim na bhFéilte 2021

Cheadaigh an Bord maoiniú ar luach €45,660.00 agus £16,800.00 do 26 deontaí faoi Ghlaoch 2 de Scéim na bhFéilte 2021 (**Aguisín 2**).

Ghlac an Bord leis an moladh go bhfáilteofaí roimh iarratais ar Scéim na bhFéilte ina dhá nglaoch in aghaidh na bliana feasta.

Scéim Cholmcille

Cheadaigh an Bord maoiniú de luach €2,700.00 do Chló Iar-Chonnacht (CC21003) faoi Scéim Deontas Cholmcille.

Leasuithe Buiséid

Tugadh suntas do leasú buiséid 2021 a cheadaigh an Príomhfheidhmeannach do Chonradh na Gaeilge.

Scéim na gCompántas Drámaíochta 2021

D'fhág S. Ní Chéide an cruinniú ag an bpointe seo de bharr baol coimhlint leasa agus thug an Leas-Chathaoirleach tuairisc don Bhord ar na moltaí faoin scéim seo.

Cheadaigh an Bord an maoiniú seo a leanas faoi Scéim na gCompántas Drámaíochta:

Uimhir Thagartha	Ainm an Eagrais	Méid Iarrtha	Méid Molta
2101002.02	Aisling Ghéar	£30,000.00	£27,500.00
2101002.09	Fíbin Teo	€40,000.00	€36,500.00
2101002.12	High Rock Productions Ltd	€50,000.00	€45,500.00
2101002.10	Graffiti Theatre Company	€15,631.00	€14,500.00
2101002.07	Branar	€25,000.00	€21,500.00
2101002.11	Guthanna Binne Síoraí	€12,000.00	€10,500.00
2101002.01	Ababú	£15,880.00	£13,500.00
2101002.06	Axis	€10,000.00	€8,500.00
2101002.14	Mumbro Top	€28,500.00	€25,000.00
Iomlán molta		€162,000.00	£41,000.00

D’fhill S. Ní Chéide ar láthair an chruinnithe.

b) An Coiste Forbartha

Rinne Cathaoirleach an Choiste Forbartha cur síos ar na nithe a pléadh ag an gcuinniú den Choiste Forbartha 13 Aibreán 2021 agus ag an gcuinniú aonmhíre den Choiste 22 Aibreán 2021.

An Luacháil ar an gCur Chuige Comhpháirtíochta

Tuairiscíodh go raibh díomá ar an gCoiste agus ar an bhFeidhmeannas faoin easpa dul chun cinn sa luacháil de bharr gan comhlacht ar bith a bheith ar fáil le tabhairt fúithi go dtí seo, agus gur socraíodh cruinniú aonmhíre chun iarracht a dhéanamh teacht ar bhealaí eile le tabhairt faoin luacháil. Tuairiscíodh go ndéanfar iarracht taighdeoirí éagsúla a fhosú leis na bearnaí a líonadh go comhthreomhar ar mhaithe leis an bpróiseas luachála a bhrostú. Thug Cathaoirleach an Choiste aitheantas don fheidhmeannas as a gcuid iarrachtaí teacht ar thaighdeoirí le tabhairt faoi na gnéithe éagsúla den luacháil.

An Scéim Forbartha Líonraí Gaeilge

D’fhág W. Majekodunmi an cruinniú ag an bpointe seo.

Cuireadh in iúl go bhfuil baol coimhlínt leasa ag roinnt Comhaltaí i dtaca leis an mír seo, agus de réir an pholasaí coimhlínt leasa nár chóir dóibh a bheith páirteach sa phlé. Tar éis plé ar an gceist, rialaigh an Leas-Chathaoirleach gurb ann do Bhaol Coimhlínt Leasa i leith roinnt comhaltaí. Dhiúltaigh M. Ní Chonghaile imeacht ón gcuinniú, agus chinn an Leas-Chathaoirleach an mhír seo a chur siar go dtí an chéad Chruinniú Boird eile, ar an gcoinníoll go mbeadh seisiún oiliúna leis an oiliúnóir roimh an gcuinniú sin, agus comhairle tugtha ag an oiliúnóir i leith na ceiste. Dearbhaíodh go rachadh an feidhmeannas i dteagmháil leis an mBord chun dáta an tseisiúin oiliúna a shocrú. Cuireadh in iúl go bhféadfaí Cruinniú Boird breise a shocrú i mí na Bealtaine sa chás go gceapfaí Cathaoirleach, agus go bpléifí an mhír seo ag an gcuinniú sin. Chuir an Príomhfheidhmeannach in iúl go lorgódh sé comhairle ó na Ranna i dtaca leis an mbaol coimhlínt leasa áirithe seo chomh maith.

c) An Coiste Iniúchta

Rinne Cathaoirleach an Choiste Iniúchta cur síos ar na nithe a pléadh ag an gcruinniú den Choiste ar an 29 Márta 2021. Tugadh suntas do na pointí seo a leanas:

- i. Glacadh le dréacht de Chuntais 2020, a leagadh leis an Ard-Reachtair Cuntais & Ciste ag deireadh mhí an Mhárta;
- ii. Pléadh an Clár Rioscaí, atá faoi bhráid an Bhoird inniu, agus
- iii. Chuir an tIniúcháir Inmheánach dhá thuairisc i láthair an Choiste.

Ghlac an Bord leis an gClár Rioscaí agus leis an Ráiteas i leith Socruithe Inmheánacha Airgeadais, ar leathanach é ón dréacht de Chuntais 2020.

D'fhág N. Ó Gallochobhair agus L. Rushe an cruinniú ag an bpointe seo.

09.188 RÁITEAS CAITEACHAIS GO 31 MÁRTA 2021

Chuir an Stiúrthóir Seirbhísí Corparáideacha an Ráiteas Caiteachais amhail 31 Márta 2021 i láthair an Bhoird agus bhí plé ina leith. Tugadh suntas do na pointí seo a leanas:

- i. Thug na Ranna Urraíochta cead d'Fhoras na Gaeilge na fuílligh bhainc ag deireadh 2020 a chur san áireamh i soláthar 2021; agus
- ii. Is ionann caiteachas Fhoras na Gaeilge faoi dheireadh Ráithe 1 agus nach mór 20% de bhuiséad iomlán Fhoras na Gaeilge don bhliain, rud atá cothrom le patrúin chaiteachais i mblianta roimhe seo.

Glacadh leis an Ráiteas Caiteachais.

10.188 CUNTAIS INIÚCHTA AN FHOIRIS TEANGA 2019

Chuir an Stiúrthóir Seirbhísí Corparáideacha Cuntais Iniúchta an Fhoirís Teanga 2019 i láthair an Bhoird. Meabhraíodh don Bhord gur faomhadh dréachtchuntais Fhoras na Gaeilge in 2020, agus gur bhain na cuntais seo le Cuntais Chomhdhlúite an Fhoirís Teanga (Cuntais Fhoras na Gaeilge agus Ghníomhaireacht na hUltaise). Cuireadh in iúl gur beag leasú a rinneadh ar na Cuntais le linn an phróisis iniúchta, agus gur leasuithe sa téacs a bhí iontu go príomha, go háirithe sa nóta faoi chúrsaí pinsin.

Dearbhaíodh go n-ullmhaítear Cuntais Fhoras na Gaeilge i nGaeilge agus i mBéarla, agus gur leagan Béarla de na Cuntais Chomhdhlúite a chuirtear faoi bhráid an chruinnithe Boird den Fhoras Teanga, leis an obair le foireann Ghníomhaireacht na hUltaise agus an Ard-Reachtair a éascú. Soiléiríodh go bhfoilsítear na Cuntais go dátheangach mar chuid den Tuarascáil Bhliantúil. Fiosraíodh an féidir leagan Gaeilge de Chuntais Chomhdhlúite an Fhoirís Teanga a bheith ar fáil don Chruinniú Boird den Fhoras Teanga feasta agus do Chruinniú Boird Fhoras na Gaeilge, agus dhearbhaigh an feidhmeannas go ndéanfadh siad a ndícheall leis sin a chinntiú mar chur chuige.

11.188 COMHFHREAGRAS

Ní raibh aon chomhfhreagras le tuairisciú.

12.188 AON GHNÓ EILE

Thug K. Ó hEadhra ardmholadh d'fhoireann Fhoras na Gaeilge a bhí ag plé le cruinniú pleanála teanga sa Chlochán as caighdeán an chruinnithe.

Pléadh soláthar neamhúdairithe na tuairisce maidir le struchtúir inmheánacha oibre Fhoras na Gaeilge do na meáin. Chuir an Feidhmeannas a dtuairim in iúl gur faoi struchtúir inmheánacha oibre Fhoras na Gaeilge a bhí moltaí na an tuairisce. D'iarr an Bord eolas breise faoin méid a bhí sa tuairisc. maidir le scéimeanna a tharmligean leis na Ceanneagraíochtaí. Dearbhaíodh go mbeidh an Bord páirteach sa phlé agus go lorgófaí ionchur an Bhoird de réir mar ba chúil le haghaidh cinntí ábhartha. Fiosraíodh cén fáth gur i mBéarla a bhí na moltaí, agus míníodh gur cáipéis a bhí ann a d'úsáid an sainchomhairleoir a bhí ann lena mholtaí a chur i láthair na foirne, agus nach raibh Gaeilge ag an sainchomhairleoir.

Tagraíodh do roinnt drochscéalta don Ghaeilge a bhí sna meáin le déanaí, lena n-áirítear ainmniú an eastáit tithíochta i gcontae Chiarraí, na deacrachtaí a bhí ag clann éileamh saoránachta a phróiseáil trí Ghaeilge, agus an easpa rogha Gaeilge sa phróiseas clárúcháin do vacsaín Covid-19. D'iarr an Bord go scríobhfadh an Leas-Chathaoirleach litreacha chuig na húdaráis chúil thar cheann an Bhoird. Aontaíodh chomh maith gur chóir cur chuige seasmhach a fhiosrú go mbeidh Foras na Gaeilge in ann gníomhú ar scéalta den chineál sin, agus cuireadh in iúl go bhféadfadh a leithéid de chur chuige íomhá Fhoras na Gaeilge a neartú i measc an phobail.

Thréaslaigh an Leas-Chathaoirleach leis an Stiúrthóir Seirbhísí Forbartha, Éamonn Ó hArgáin, atá ag dul ar luathscor an tseachtain seo chugainn. Ghabh an Bord agus an Príomhfheidhmeannach comhghairdeas agus buíochas le hÉamonn as an méid atá bainte amach aige le linn a 41 bliain seirbhíse le Foras na Gaeilge agus le Bord na Gaeilge roimhe sin. Guíodh gach rath air ina chuid tionscadal saoil amach anseo.

Regina Uí Chollatáin

Regina Uí Chollatáin
Cathaoirleach
11 Meitheamh 2021

Tinreamh ag Cruinnithe Boird in 2021

	29/01/ 2021	01/03/ 2021*	12/03/ 2021	23/04/ 2021	11/06/ 2021	30/07/ 2021	17/09/ 2021	29/10/ 2021	10/12/ 2021
Barra Ó Muirí	✓	✓	✓	✓					
Conor McGuinness	✓	✓	✓	✓					
Maighréd Ní Chonghaile	✓	✓	✓	✓					
Máire Ní Neachtain	✓	✓	✓	✓					
Sorcha Ní Chéide	✓	✓	✓	✓					
Niall Ó Gallochobhair	✓	✓	X	✓					
Daithí Mac Cárthaigh	✓	✓	✓	✓					
Wuraola Majekodunmi	✓	✓	✓	✓					
Neasa Ní Chiaráin	✓	✓	✓	✓					
Liam Rushe	✓	✓	X	✓					
Liadh Ní Riada	✓	✓	✓	✓					
Doiminic Ó Brolcháin	✓	✓	✓	✓					
Caoimhín Mac Giolla Mhín	✓	✓	✓	✓					
Kevin Ó hEadhra	✓	✓	✓	✓					

* Cruinniú Speisialta den Bhord

Aguisín 1: Deontais ceadaithe faoi Scéim na gCampaí Samhraidh 2021

Uimhir Thagartha	Ainm an Eagrais	Méid Molta
2101005.01	Ag Tógáil Clainne le Gaeilge	£ 1,750.00
2101005.02	An Cumann Gaelach, Muineachán	€1,740.00
2101005.03	An Gaeláras LTD	£ 1,750.00
2101005.04	Cairde Bhunscoil an Traonaigh	£ 1,750.00
2101005.05	Cairde Uí Néill	£ 1,750.00
2101005.06	Cairdeas, Kilmovee family Resource Centre	€2,466.00
2101005.07	Campa Chormaic	£ 1,750.00
2101005.08	Campa Chormaic an Bhreantair	£ 1,750.00
2101005.09	Campa Gaeilge Chorcaí	€1,450.00
2101005.10	Campa Gael	€2,500.00
2101005.11	Club Óige Luraigh	£ 1,750.00
2101005.12	Club Óige Setanta	£ 1,750.00
2101005.13	Cois Laoi Productions	€2,500.00
2101005.14	Coiste Champa Chormaic	£ 1,750.00
2101005.15	Coiste Forbartha Charn Tóchair	£ 1,750.00
2101005.16	Coiste Ghaeloideachas Chromghlinne	£ 1,750.00
2101005.17	Coláiste Bhlinne	£ 1,750.00
2101005.18	Conradh na Gaeilge Boirche Íochtar	£ 1,750.00
2101005.19	Conradh na Gaeilge Gaillimh	€2,500.00
2101005.20	Croí Éanna	£ 1,750.00
2101005.21	Cultúrlann Mac Adam Ó Fiaich	£ 1,750.00
2101005.22	Cumann Gaelach Leath Chathail	£ 1,750.00
2101005.23	Cumann Óige Átha an Rí	€2,500.00
2101005.24	Cumann Óige Uachtar Chluanaí	£ 1,750.00
2101005.25	Feachtas Óg-Ghluaiseacht Gaeilge	€2,500.00
2101005.26	Gaeilge le Chéile	€2,500.00
2101005.27	Gaeilge Locha Riach	€2,500.00
2101005.28	Gaelcholáiste Mhic Shuibhne	€2,315.00
2101005.29	Gaelscoil Áine	€2,500.00
2101005.30	Glór An Ghleanna (Cumann Óige an Ghleanna)	£ 1,750.00
2101005.31	Glór Dhún Geimhin	£ 1,750.00
2101005.32	Glór Mhachaire Fíolta	£ 1,750.00
2101005.33	Glór na Móna	£ 1,750.00
2101005.34	Glór Uachtar Tíre	£ 1,750.00
2101005.35	Greencastle Youth Club	£ 1,750.00
2101005.36	Ionad Uíbh Eachach	£ 1,750.00
2101005.37	Kileen National School	€2,500.00
2101005.38	M.C.P, Baile na nGallóglach	€2,450.00
2101005.39	Na Gaeil Óga C.L.G.	€2,500.00
2101005.4	Na Sáirséalaigh Leamhcáin	€2,316.00
2101005.41	Naíonra an tSléibhe Dhuibh	£ 1,750.00

2101005.42	Naíonra Léim an Bhradáin	€2,215.00
2101005.43	Naíscoil na Fíobha	£ 1,160.00
2101005.44	Naomh Padraig Coilleach Eanach	£ 1,750.00
2101005.45	Ógras na hÓmaí	£ 1,750.00
2101005.46	Pobal ar a'n Iúil	£ 1,750.00
2101005.47	Raidió Rí-Rá	€1,432.00
2101009.01	Ógras Nás na Ríogh	€1,950.00
2101009.02	Campa Ógras Marino	€2,155.00
2101009.03	Campa Ógras Léim an Bhradáin	€2,000.00
2101009.04	Campa Ógras Baile na Manach	€2,090.00
2101009.05	Campa Ógras Bhaile Uí Thaidhg	€2,305.00
2101009.06	Campa Ógras Bhaile an Mhuileann	€2,305.00
2101009.07	Campa Ógras Thrá Lí	€2,260.00
2101009.08	Campa Ógras Mhic Amhlaidh	€2,205.00
2101007.01	Campa Samhraidh 1 – An Muileann gCearr	€2,500.00
2101007.03	Campa Samhraidh 1 – Baile Átha Luain	€2,500.00
2101007.05	Campa Samhraidh – Baile Brigín	€2,500.00
2101007.06	Campa Samhraidh 1 – Baile Locha Riach	€2,500.00
2101007.08	Campa Samhraidh 1 – Cabhán	€2,500.00
2101007.10	Campa Samhraidh 1 – Caisleán Cnucha	€2,500.00
2101007.12	Campa Samhraidh 1 – Ceatharlach	€2,500.00
2101007.14	Campa Samhraidh 1 – Guaire	€2,500.00
2101007.16	Campa Samhraidh 1 – Rath Maoinis	€2,500.00
2101007.18	Campa Samhraidh 1 – Uarán Mór	€2,500.00
Iomlán molta		€3,654.00 agus £50,160.00

Aguisín 2: Deontais ceadaithe faoi ghlaoch 2 de Scéim na bhFéilte 2021

Uimhir Thagartha	Ainm an Eagrais	Méid Iarrtha	Méid Molta
2101008.07	Coiste Forbartha Charn Tóchair	£3,500.00	£2,400.00
2101008.14	Féile Traidphicnic	€4,519.00	€3,000.00
2101008.02	Áras Éanna	€5,000.00	€3,500.00
2101008.08	Cumann Forbartha Chois Fharrage	€5,000.00	€3,500.00
2101008.11	Féile Liteartha Corca Dhuibhne	€5,000.00	€3,500.00
2101008.01	An tSean Bheairic	€4,307.00	€3,000.00
2101008.20	Glór Uachtar Tíre	£3,500.00	£2,400.00
2101008.34	University of Limerick	€5,000.00	€3,500.00
2101008.13	Féile Scéalaíochta na Glaise	€3,960.00	€2,700.00
2101008.18	Glór Dhún Geimhin	£3,500.00	£2,400.00
2101008.03	Baboró International Arts Festival For Children	€5,000.00	€3,500.00
2101008.04	Cairde Dhroim nDamh	£2,500.00	£1,700.00
2101008.28	Ollscoil Uladh	£3,500.00	£2,400.00
2101008.16	Gaeilge Locha Riach	€3,100.00	€1,700.00
2101008.33	The Gap Arts Festival	€3,000.00	€1,800.00
2101008.05	Cashel Arts Festival	€5,000.00	€3,000.00
2101008.09	Cumann Liam agus Thomáis	€1,100.00	€60.00
2101008.10	Féile Bhaile an Tóchair	€2,625.00	€1,500.00
2101008.24	Ionad Uíbh Eachach	£2,600.00	£1,500.00
2101008.30	Scoil Acla	€5,000.00	€3,000.00
2101008.06	Clifden Arts Festival	€3,000.00	€1,800.00
2101008.15	Forbairt Dhún Lúiche/ Coiste Ionad Pobail Dhún Lúiche	€5,000.00	€3,000.00
2101008.17	Galway Film Fleadh	€5,000.00	€3,000.00
2101008.19	Glór Léim an Mhadaidh	£3,500.00	£2,000.00
2101008.29	Pobal ar a'n Iúl	£3,500.00	£2,000.00
Iomlán Molta		€45,660.00	£16,800.00